

【火燒岫崗<sup>1</sup>】李宜諭原作

在鄉下，鬧鬧熱熱个舊曆年一過啊忒，又伸著恬靜个生活。毋過，行過消防隊時，會看著該一臺一臺个消防車駛出車庫停在路脣，雖然看毋著無閒泊杈个身影，乜聽毋著緊張刺耳个警報聲，毋過，空氣裡背因等息把仔愛停動个電波，一種神經擱繃个氣氛。

舊曆二月係美濃人掛紙个時節，恁多年天時改常<sup>2</sup>，春雨慢到，二月个岫崗燥絲絲仔，故所，第一個拜六掛紙个臨暗開始，就會看著岫崗頂出現沖天个煙，接下來紅紅个火光就透出來吔：阿姆哀唷，火燒岫崗哩！消防車个身影像走相逐樣仔春一路出，警報聲在街路項颺等過<sup>3</sup>，一臺、兩臺、三臺……總概都出動哩，毋過，斷烏過後就難耐吔，高不將換手腳流掠个阿兵哥，拿等鐮仔、刀嫲同附近个竹頭、樹仔、草仔劈忒——斷火路。

第二日打早，「轟……叮叮叮叮、叮叮叮叮」直升機个聲就在天頂來來去去響無停。「直升機去美濃湖舀水哩啲！」美濃湖

黏時鬧熱起來，大家煞煞號隻好位仔，坐下來定定仔看等直升機在湖面舀水个景象。遠遠飛過來个直升機，會到美濃湖个時節，就會定定仔降下來，等到肚屎下背个大袋仔揸著水面，佢就會遽遽同袋仔向前拖一下再擲起來，淦淦一大袋个水就吊起來吔，續等就同這恁大袋个水晃晃激激<sup>4</sup>吊到廣善堂背个岫崗頂，對半天高倒啊下。恁大袋个水，隨化做一陣白白个濛煙散淨淨。

天頂个直升機一轉又一轉、對打早飛到斷烏；山腳下消防車个水一管又一管緊洩；岫崗該紅紅个火跡對山前遶到山背、對山坪遶到山頂。恬靜个暗夜，總會聽著竹頭燒到劈里啪啦<sup>5</sup>響个聲，火屎就跔等風一哪仔飛，等到天光該下，人家个屋頂、大路頂、田坵肚跌到全全係烏烏个火燐煤。岫崗个火日夜燒等，山下个消防車、救護車、阿兵哥乜日夜掌等……。下把仔，伸著沖天个白煙，大家想愛轉擺<sup>6</sup>一下个時節，紅紅个火尾又好恬恬个躑啊出<sup>7</sup>，就恁仔一直愛燒到掛紙結束。

火燒岫崗對環境、對山林个破壞十分大，看著劈竹頭个阿兵哥分樹杈仔剛<sup>8</sup>到手同面都血流血著，實在分人已毋盼得！掛紙个方式，係毋係需要鄉親好好來思考、參詳呢？

<sup>1</sup> 岫崗：音 in gongˊ；小山崗。

<sup>2</sup> 改常：音 goiˊ songˊ；反常。

<sup>3</sup> 颺等過：音 xiu denˊ go；行動迅速如風而過。

<sup>4</sup> 晃晃激激：音 gongˊ gongˊ gieb gieb；因搖晃使得水從容器中溢出來。

<sup>5</sup> 劈里啪啦：音 pi li pa la；擬聲詞。形容爆裂、拍打等的連續聲音。

<sup>6</sup> 轉擺：音 zonˊ baiˊ；休息。

<sup>7</sup> 躑啊出：音 liungˊ a cudˊ；鑽出來。

<sup>8</sup> 剛：音 guaˊ；被尖銳的東西劃破。